

金匱要略



金 凌

注 匱

要

略



北京中医药大学图书馆版权所有

光緒三十四年春月
寶慶經元書局校刊



北京中医药大学图书馆

1994

敘言

余奉諱里居每嬰疴疾偶檢方書茫無涯涘因嘆前
賢如坡公沈存中輩皆明於醫理用以濟世利物其
不効者特格物未至耳吳航 陳脩園先生精岐黃

術以名孝廉宰畿輔晚歸里中與 先大夫結真率

會余嘗撰杖侍坐聆其談醫洞然有見垣一方之眼
竊謂近世業醫者無能出其右也今 先生捐館數

年矣令嗣 靈石傳其業世咸推重焉 先生生前

所刊醫書若干種已傳海內今復讀其金匱要略淺
注一十卷明顯通達如指諸掌雖王叔和之闡內經
不是過也 靈石又遵庭訓爲金匱歌括六卷取韻
語之便於記誦附以行世猶 先生志也昔范文正
公有言不爲良相則爲良醫 先生在官在鄉用其
術活人歲以千百計況著書以闡前人之旨爲業醫
者之鈎覘其功豈淺鮮哉 靈石以序見委余固不
知醫然竊願爲醫者講明其理庶有以濟世利物而

勿誤人於生死之交也是爲序

道光十年歲次庚寅仲春望後愚姪林則徐拜撰



金匱要畧淺註凡例

一金匱爲仲景治雜病之書其深文奧義與傷寒論同近醫宗其名而亡其實能發明之者絕少然聖人之道千古常昭自唐宋以來醫書汗牛充棟庸庸者勿論其中有可觀者不下十餘家雖不可謂得仲景之真傳而間有善悟暗合者亦有千慮一得者散之各書難以參考今取各書之菁華約爲小註即於金匱本文中另以小字條貫之凡本文中所有之義既無漏而弗詳本文所無之義不敢妄添蛇足又於各節之虛字尋繹其微妙之旨而暢遂言之所謂讀於無字處也

一予所刻各種原以補前人所未備非務博也亦非有意而求新也

而海內諸君子許可者雖多而畏其難而思阻者亦復不少惟傷寒論淺註與此書字字皆前賢所已言語語爲中人所共曉蓋書本深深而深之旨反晦矣故於淺之一字加之意焉

一金匱要略趙以德胡引年程雲來沈目南喻嘉言徐忠可魏念庭尤在涇輩所著之書盛行於海內凡業醫者無有不備余卽於書中取其能發揮本文之旨者重訂而收錄之以爲迎機之導至於囿於氣習處惑於異說處逞其臆見處前後不相貫通處不得不爲之改正然改正處以素問靈樞爲主以難經爲輔以千金外臺等書而推廣之以各家諸刻而互參之必求其與仲師本章本節上下節有闡發無滯碍者然後註之是則予之苦心也夫



一余註是書將半二兒元犀到直余命其仿傷寒論各方歌括體例
韻註續成六卷余重加改正歌解頗明記誦頗便命錢姑附於卷
後

一金匱要畧自第一篇至第二十二篇皆仲景原本二十三篇以後
前賢謂爲宋人所續註家多刪之余向著金匱讀四卷亦刪之嚴
朱紫之辨也茲刻仍宋本之舊錄其本文不加註解而分別之

一原文有附方云出千金外臺諸書似屬後人贅入然方引藥味頗
亦不凡或原爲仲景所制因述彼習用之書名今悉如徐鎔傳本
附列但亦不加註解以分別之

金匱要畧讀法

金匱要畧仲景治雜病之書也與傷寒論相表裏然學者必先讀傷寒論再讀此書方能理會蓋病變無常不出六經之外傷寒論之六經乃百病之六經非傷寒所獨也金匱以傷寒論既有明文不復再贅讀者當隨證按定六經爲大主腦而後認證處方纔得其真諦

一論中言脉每以寸口與趺陽少陰並舉又自序云按寸不及尺握手不及足人迎趺陽三部不忝等語是遍求法所謂換用素問九卷是也然論中言脉不與趺陽少陰並舉者尤多是獨取寸口法所謂換用八十一難是也然仲景一部書全是活潑潑天機凡寸

口與跌陽少陰對舉者其寸口是統寸關尺而言也與關尺並舉者是單指關前之寸口而言也然心營肺衛應於兩寸即以論中所言之寸口俱單指關前之寸口而言未始不可也且足太陰屬腎足跌陽穴屬胃仲景用少陰跌陽字眼猶云腎氣胃氣少陰診之於尺部跌陽診之於關部不拘拘於穴道上取診亦未始不可也然而仲景不言關尺止言少陰跌陽何也蓋兩寸主乎上焦營衛之所司不能偏輕偏重故可以槩言寸口也兩關主乎中焦而脾胃之所司左統於右若剔出右關二字執着又不該括不如止言跌陽之爲得也兩尺主乎下焦兩腎之所司右統於左若剔出左尺二字執着又不該括不如正言少陰之爲得也至於人迎

穴在結喉爲足陽明之動脈診於右關更不待言矣而且序文指出三部二字醒出論中大眼目學者遵古而不泥於古然後可以讀活潑潑之仲景書

一金匱所載之證人以爲不全而不知其無微不至何也人人所共知者不必言也所言者大抵皆以訛傳訛之證中工所能治者不必論也所論者無一非起死回生之術書之所以名爲要畧者蓋以握要之韜畧在此也謂爲不全將何異乎坐井觀天也

一讀金匱書讀其正面必須想到反面以及對面旁面尋其來頭爲上面究其歸根爲底面一字一句不使順口念去一回讀方得個一番新見解愈讀愈妙讀周易及熟於宋儒說理名書者更易發

明余治舉子業凡遇理致題得邀逾分許可者半由得力於此
一風寒暑溫燥火六氣爲病金匱惟以風寒括之者蓋風本陽邪寒
本陰邪病總不離陰陽二氣故舉此二邪爲主而觸類引而伸之
而推究其表裏陰陽虛實標本常變之道如羅經既定子午而凡
各向之正鍼兼鍼一目了然

一金匱合數證爲一篇當知其妙如痙濕喝合爲一篇者皆爲太陽
病百合狐惑陰陽毒合爲一篇者皆爲奇恒病中風與歷節合爲
一篇者皆言風邪之變病血痺虛勞合爲一篇者皆言氣血之虛
病惟欬嗽證一與肺痿肺癰上氣合篇多係燥火之病一與痰飲
合篇多係寒飲之病二欬流同而源則異寒疝與腹滿宿食合爲

一篇皆爲腹中之病狐疝與趺蹶動腫轉筋蛇蠱合爲一篇皆爲有形之病二疝名同而實則異其間無所因襲而自爲一類者不過瘧症而已凡合篇各症其症可以互參其方亦或可以互用須知以六經鈐百病爲不易之定法以此病例彼病爲啟悟之捷法一標本之說唐宋後醫書多混用此字眼今則更甚大抵以五臟爲本六腑爲標以臟腑病爲本六氣病爲標以溫方補方爲治本之法以汗吐下清等方爲治標之法此說一行而醫道晦矣須知標本中氣說本內經經云少陽之上火氣治之中見厥陰太陽之上寒氣治之中見少陰厥陰之上風氣治之中見少陽少陰之上熱氣治之中見太陽太陰之上濕氣治之中見陽明所謂本也

言風寒熱

濕燥火
為本

本之下中之見也

言陰陽表裏相通互為中氣

見之下

氣之標也

言三陰三陽為

標

又云少陽太陰從本少陰太陽從本從標陽明厥陰不從標本從

乎中也其說詳於傷寒論淺註首卷學者當以內經為體以仲景

書為用如流俗所言標本切不可附和其說而為有識者笑



金匱要略淺註

目錄

第一卷

臟腑經絡先後病脉第一

痙濕暈病脉證第二

第二卷

百合狐惑陰陽毒病脉證第三

瘧病脉證第四

中風歷節病脉證第五

第三卷



血痺虛勞證治第六

肺痿肺癰欬嗽上氣脉證第七

第四卷

奔豚氣病證治第八

胸痺心痛短氣脉證第九

腹滿寒疝宿食脉證第十

五臟風寒積聚脉證第十一

第五卷

痰飲欬嗽脉證第十二

消渴小便不利淋病脉證第十三

